

高 01 青紅燈

黃惠玉

伊無厚話，恬恬仔做，無計較，無怨感。這馬當咧吵甲欲反過的「一例一休」恰伊攏無關係。一年三百六十五工規年週天攏無歌睏，無閑工。一日二四點鐘無暝無日，無閑時。無論是赤炎炎的日頭皎，抑是澹澹漉的落雨天，伊攏站佇遐。這是伊的工課恰責任，因為伊是——青紅燈，逐工顧佇十字路口，指揮交通。

有智慧、疼惜性命的人，駛車、騎車、行路經過十字路口，隨時注意伊面色的變化，照伊的指揮來行；討厭伊的人，看著伊的面變色，真袂恰意。目調一瞭，看著伊連鞭欲變色：青的爍過，換爍黃的，隨就欲變紅的，叫伊愛注意矣，毋通閣衝，毋過伊煞毋但無踏擋仔，油門閣催落去，趕緊欲衝過。哎哟喂！這擺好佳哉無代誌，後擺就歹講。伊的衝碰予人看著真驚惶，心臟撲撲恹！按呢青磅白磅，烏白從、烏白拚。有當時無細膩，緊早慢嘛會出代誌。

佇青紅燈的面頭前，無分車的好標，毋管是新點點、金爍爍的烏頭仔車抑是老閣舊的發財仔；無論是大頭家抑是手面趁食的艱苦人，嘛無分大細，毋管你是老歲仔抑是囡仔人，逐家攏平等。青燈行，紅燈擋，規則真簡單逐家

攏會曉，干焦看你欲遵守抑是毋遵守爾。若是愛惜性命，咱就斟酌看。若是毋看，青紅燈嘛無奈何。

危險的十字路口，青紅燈鬧頭前，替咱顧路面。雖然無出聲嘛會當共咱指示當時好好行、當時愛停。有伊的時陣，咱過車路加真安心。伊親像有智慧有愛心的序大，逐工無暝無日佇十字路口共咱顧、共咱指示。

做工課照起工，袂張、袂厭瘡，免領薪水、免排假的青紅燈，感謝你的照顧，予阮佇危險的十字路口會當大伐行，穩心仔騎，安心仔駛。

十字路口的青紅燈，予咱駛車行路加真放心。性命，真向望嘛有咱的青紅燈，佇人生的每一个坎站共咱指示，當時好好衝，當時愛踏擋仔，莫予咱衝過頭毋知擋。若無，等到事業、身體、家庭出問題，才知害，按呢就袂赴矣！

游蒼林

哇，上尾一節課總算下課矣，欲紮轉去的物件趕緊收收咧。作業簿仔、聯絡簿仔，一定愛會記得紮，轉到厝才袂予人罵甲臭頭。便當盒仔嘛愛提轉來去洗，啊若無，明仔載就愛洗臭酸的便當盒仔，嘛會予老師罵。

阮兜離學校無佬遠，用行的十分鐘就到矣，毋過，我毋免行遐緊，沓沓仔行就會用哩，因為，今仔日早起欲出門的時陣，阮阿母有共我交代，放學愛較緊轉來門祛葉仔。我才無想欲遐早就行到厝咧。著啦，先覓入來去店仔買一寡四秀仔才閣講，啊若無，等咧，我一定會枵甲必必掣。

「阿母仔，我轉來矣。I'm home!」猶未踏入戶模我就大聲叫阮阿母。我定定落一寡英語予阿母聽。阿母雖然有時陣敢若虎豹母咧，啊毋過，我嘛是真愛伊。莫怪阿姊笑我有淡薄仔『戀母情結』，毋過阿母嘛講：「恁姊仔細漢的時嘛是一工到暗共阿母綴牢牢，真正是龜笑鰲無尾，鰲笑龜頭短短。哈哈！」

「冊包因咧就緊來祛葉仔hânn?」阮阿母又閣咧催矣。「好啦好啦，連鞭就來啦！」阮兜是種田的，阿爸講佈田無利純，只好改種老葉仔。種老葉仔是足厚工的，大

人去種葉仔，挽葉仔，阮因仔人若有閒，就愛鬥疊葉仔。祛葉仔就是共對園裡挽轉來的倒佇大水桶內底用水洗咧，才閣一葉一葉祛做伙，疊予好勢，上煞尾才一沿一沿因佇籠仔底裝予好勢，才交予販仔賣出去。

祛葉仔真簡單，毋過規工攏做全款的動作，實在有夠無聊的，而且，工錢嘛足少的，放學了後若做2點鐘上濟才會當趁八九十箍爾爾。熱天，天較慢慢暗，啊若寒天時仔，著愛做甲暗眠摸才會當歇睏。別人兜的因仔放學了後，若毋是看電視就是拍電動、耍電腦，我實在足欣賞個的。毋過，阿母定定講：「艱苦頭，快活尾。細漢食過苦的人，大漢較有出脫的機會。」看阮阿爸阿母逐工攏無暝無日咧趁錢飼阮一家口仔，實在是誠辛苦，咱做序細的會當鬥做一寡工課嘛是應該的。錢少無要緊，阮兜一家，會當平安幸福，我就足滿足矣！

高 03 搖囡仔歌

王秀容

細漢逐暗欲睷，阿母攏會唱歌予阮聽。唱別人寫的無希罕，伊是家己鬥句，鬥伊的教示，鬥伊的愛。一開唱攏是這四句：

心肝嬰，目睷瞋瞋，睷醒恁你去讀冊；
去讀冊，趣味濟，同學若像兄弟姊妹。

好姊妹疼小妹，乖小妹愛姊妹；
心肝嬰，目睷瞋瞋，恁攏是我的寶貝。

聽著第一句，阮就知影愛乖仔睷囉！伊的歌，若像共阮注預防射。學校有啥物代誌，伊攏未卜先知，用歌聲教阮按怎面對。我讀幼稚園的第一工，當伊輕聲仔講「下晡五點來接你」，我目屎就津落來。伊隨共我攬牢咧唱這塊歌安慰我，叫我毋免驚。有影，讀冊像伊講的，誠趣味，有足濟同學佮我要。誠感謝阿母遮巧，用搖囡仔歌予阮有依倚。

伊的歌無寫落來誠無彩。伊笑講第一段烏白編，哩哩囉囉，竹篙鬥菜刀。有當時仔閣唱甲咄龜，袂記得了了矣。

第二段咧？伊講姊妹仔相愛才袂冤家，伊無想欲做公親，予阮怨無公平。較厲害的是，阿母會呵佬阮相疼痛的事實，表示伊有看著阮的表現，阮感覺足幸福的。

其實伊麻木是烏白鬥，是看阮的需要！有一條，是咧講我讀小學的頭一工……

一兩三，穿新衫；四五六，冊愛讀；

七八九，用頭腦；算到十，喙愛合。

伊講「穿新衫」是新點點的開始，愛穿予婿婿予人恰意。「冊愛讀」上重要，愛阮學好模樣「用頭腦」。上尾句「喙愛合」，一兼二顧訓練咬音，嘛向望阮愛喙合專心仔聽課，毋通厚話。到今阮姊妹仔上課攏足專心，誠實著愛感謝阿母用唱歌來雕阮的心性。

科學研究講：全一件代誌若做21擺就會慣勢。阿母的歌一睷唱十幾擺，兩工就二十外擺矣！挂著重要的，會唱規禮拜，算算咧就超過百五擺矣。莫怪阮姊妹仔會遮愛讀冊遮相愛。

麻木知當時開始，欲睷就無閣聽伊編的歌矣。轉大人的國中生是無可能願意閣聽搖搖囡仔歌。有幾若擺，我會英雄想起阿母為阮姊妹仔唱的歌。雖然調佮詞簡單甲有淡薄仔俗，毋過阿母簡單的愛永遠是阮的靠山。